

MARJORIE VERMEER

E aña aki Checkpoint Color ta 26 aña cu Carnaval



CHECKPOINT COLOR e aña aki ta cumpli 26 aña den carnaval. Pa e ocasion aki Bon Dia Aruba a papiacu Marjorie Vermeer, propietaria di Checkpoint Color.

"Nos di Checkpoint Color semper a kere den carnaval; nos ta wak e como algo propio di nos hendenan. Sinemabergo nos ta haña cu, pa loka ta trata organizacion di carnaval, no a sigui cu e cambianan di pueblo. Pues, bo ta haña otro gruponan, e muchanan cu ta lanta ta otro; pues, e carnaval no a bai cu e gustodi e cambianan di pueblo. Pasobra, normalmente bo mester duna e hendenan loka nan ta gusta y esey bo ta ripar" e masha facil pasobra hubentud no ta gusta carnaval.

E chikitanan ta bai aden pero ora nan bira grandi nan no ta bai aden mas. Mamanan ta forza nan chikito bai aden pero ora nan bira grandi ya nan no kier participá. E generacionan mas bieuw ta keda entusiasma y pa un of otro motibo nos no a sa di hink'e den nos jiunan of nos

jiunan no a haña gruponan cu a apelá na nan pa asina nan sinti cu nan kier bai aden. Pesey mi ta kere cu e forma cu carnaval ta wordo organizá awor aki nos no ta contribuí na e gruponan actual na Aruba.

Pesey bo ta haña cu carnaval ta birando mas chikito y mi ta haña cu mester busca hende jong aden pasobra mi ta kere cu nos mester scucha nos hubentud pasobra nos hubentud ta esun cu ta manda. Mescos cu bo ta bin cu cambio den paña, carnaval no a bai cu e moda actual; e no a bai cu e grupo actual; e no a bai cu e smaak actual; ta pesey mes carnaval ta birando hopi chikito pasobra ta e gruponan di e hendenan di mas grandi a keda aden y e babynan a keda aden, pero e grupo mes cu ta keda meimei y cu mester carga carnaval y sigui cuné, nan ta preferá para un banda y wak.

Ta pesey nos ta haña cu mester bin hopi sanger jong den e organizacion di SAC pa asina bin cu smaaknan mas jong.

Mi ta kere cu carnaval a pasa di un evenemento pa un fiesta cu mester wordo organizá profesionalmente, no solamente haci algo pa smaak.

Nos como comerciante ta haci hopi pa carnaval. Semper nos ta saca portret pa nos estimulá, pero el a bira cu cada bes bo tin mas pérdida durante temporada di carnaval, pasobra bo no ta logra saca tur e evenementonan pasobra no tin sistema pa bende e portretnan, no tin entusiasmo mas manera promé pasobra e gruponan ta hopi chikito."

Riba nos pregunta di cu e ta compartí e opinion di cu pa motibo cu carnaval a bira mas luhoso y mas caro, ta pesey hopi hende no ta participá, Marjorie a bisa cu e no ta kere esey.

"Tempo cu nos tabata jong cu bo tabata paga 175 florin pa participá den un grupo di carnaval, e tabata hopi placa y bo ta spaar pa bo pagué. Pakico? Pasobra e ta un prioridad pabo, bo ta hacié.

Placa no ta un problema, tur cos ta dependé di e smaak cu bo kier pone aden.

Si bo wak e carnaval di mucha, con nan ta bai participá pa reina, cuanto placa e mananan ta hinca aden. Nan ta hacié pasobra nan ta hañ'e algo leuk pa haci. Pero, si bo ta wak cu e mucha mes no tin smaak aden, bo no ta lagué bai den algo caro. Si e mucha pidibo, bo ta hacié si. E mester ta algo great pa e hendenan hinca placa aden; si no ta asina nan lo hinca e placa den algo otro pa complacé nan jiunan.

Mi no ta kere cu placa ta e factor, mi ta kere cu djis e no ta great mas pa tuma parti na dje.

Bo por tin un mensahepa e pueblo carnavalesco?

Sea cu bo ta aden of afó, sigui saca portret. Pasobra portret ta e único recuerdo cu



bo por keda cuné despues di a pasa durante di e fiestanan di carnaval. Portret ta un recuerdo pa semper.

